

मार्निंग डोगरी न्यूज बुलेटिन, समे. 09.20 Hrs

<><><><><><>

### Headlines

- वायनाड च बडी भारी पस्सियां पौने कारण मरने आहलें दी गिनतरी बधियै 135 होई गेई ऐ। सांझा राहत ते बचा अभियान जारी ऐ।
- लोकसभा नै जम्मू-कश्मीर लेई 1 लख 18 जहार करोड़ रुपें दा बजट पास करी दिता ऐ। वित्त मंत्री निर्मला सीतारमण होरें आखेआ ऐ जे केंद्र सरकारै जम्मू-कश्मीर दा भार सांझा कीता ऐ तां जे ओह अपना पैसा विकास कम्में लेई खर्च करी सकै।
- प्रशासनिक काउंसल नै पच्छमी पाकिस्तानी रिफ्यूजिएं गी स्टेट लैंड दे मालिकाना हक देने दी मंजूरी देई दिती ऐ।
- सुरक्षाबलें संदिग्ध नकलो हरकत परैंत पुंछ च तपाशी अभियान चलाया। पुंछ च थेहारें सने हिज्बुल मुजाहिद्दीन लेई कम्म करने आले इक आरोपी गी गिरफ्तार कीता ऐ।
- श्री अमरनाथ जी दी इस बरे दी यात्रा दे श्रद्धालुएं दा आंकड़ा 4 लख 70 जहार गी पार करी गेआ ऐ।

<><><><><><>

### Wayanad Landslide

केरल दी वायनाड थाहर ल्हास पस्सियां पौने करी मरने आलें दी गिनतरी बदिए 135 होई गेई ऐ। मरने आलें दी गिनतरी च होर बाददा होई सकदा ऐ।

लाहके दे बक्ख-बक्ख अस्पतालें च 186 लोकें दा इलाज चला'रदा ऐ। लगभग 200 लोक लापता न। सेना दे त्रवें अंगें राष्ट्रीय आपदा मोचन बल ते होर दुइयां एजेंसियां सांझे तौर पर बचाव ते राहत कम्में च लग्गी दियां न। वायनाड च 45 राहत शिविर कायम कीते गए न जित्थे 3 ज्हार 69 लोकें गी रक्खेआ गेआ ऐ। अल्पसंख्यक मामलें दे राज्यमंत्री होर कल राती वायनाड पुज्जे ते राहत कम्में दा जायजा लैता। उनें एनडीआरएफ ते सेना दे वरिष्ठ अधिकारिएं कन्नै गल्लबात कीती। कोझिकोड च मीडिरू कन्नै गल्ल करदे होई उनें आखेआ जे राहत ते बचाव अभियान होर तेज करी दिता जाग। उनें आखेआ जे एनडीआरएफ दे त्रै होर बद्द दल ते सेना दे डाग स्कॉड गी बी बचाव अभियान च शामिल कीता जाग। केरल दे राज्यपाल आरिफ मोहम्मद खान ते मुखमंत्री पिनराई विजयन होर अज्ज वायनाड दा दौरा करंगन।

<><><><><><>

### J&K Budget

लोकसभा नै कल केंद्र सरकार दे 2024-25 दे 48 लक्ख 21 ज्हार करोड़ रपे दे बजट गी मंजूरी देने दे कन्नोकन्नी 1 लक्ख 18 ज्हार 390 करोड़ रपे दे जम्मू-कश्मीर दे बजट गी बी मजूरी देई दिती। केंद्री खजाना मंत्री निर्मला सीतारमण होरें आखेआ जे केंद्र रकार चाहंदी ऐ जे ओह जम्मू-कश्मीर पुलस दे 12 ज्हार करोड़ रपे दे भार गी अपने सिरे पर लेई लै तां जे जम्मू-कश्मीर अपने विकास कम्में पर मते लचीलै ढंगे नै अखराजात करी सकै।

खजाना मंत्री हुंदे भाषण दे बाद जम्मू-कश्मीर दे बजट ते होरनें सरबंधत बिल मूंज जबानी वोटें कन्नै पास करी दिते गेदे। तोआई राज्यसभा च जम्मू-कश्मीर दे बजट ते आम बजट पर चर्चा जारी ऐ। एह जम्मू-कश्मीर दा उप्परोतली 5मां बजट ऐ जिसी केंद्र शासित प्रदेश च अपनी विधानसभा नेई होने दे कारण संसद आस्सेआ मंजूरी थहोई ऐ।

<><><><><><>

### AC-Decsion

उपराज्यपाल मनोज सिन्हा हुंदी अध्यक्षता च लग्गी दी प्रशासनिक काउंसल दी बैठका च लैते गेदे इक फैसले कन्नै पच्छमी पाकिस्तानी थमां बेघर होइए आए दे लोकें कन्नै होंदी आरदी फरकोफकरकी खत्म होई गई ऐ कीजे कल लैते गेदे फैसले कन्नै इनें परिवारें गी उंदिएं जिमिएं दा मालिकाना हक थहोई गेआ ऐ। इस फैसले कन्नै उनें सब्बनें परिवारें दी चिरकी मंग पूरी होई गई ऐ जेड़े स्टेट लैंड दे मालिकाना हक लेई केई दहाकें थमां जद्दोजैहद करदे आ'रदे हे। ध्यानजोग ऐ जे 2019 च जम्मू-कश्मीर थमां दफा 370 हटने दे बाद भारत सरकार नै उनें लोकें गी डोमिसाइल यानि नागरिकता दा अधिकार दिता हा। एहदे अलावा कल्लै आली बैठका च कश्मीर घाटी च कश्मीरी विस्थापित मलाजमें लेई 6 जहार आरजी आसरमे बनाने दी मंजूरी बी देई दिती गई। एह उनें सरकारी मलाजमें लेई ऐ जिनेंगी 2015 आले पीएम विकास पैकेज तैहत नौकरी दिती गई ऐ।

<><><><><><>

## JK-Committee

जम्मू-कश्मीर सरकार नै जम्मू ते कश्मीर हाई कोर्ट दे साबका जज जनक राज कोतवाल होरें गी पिछले म्हीने कायम पैनल दा प्रमुख नियुक्त कीता ऐ। एह पैनल केंद्र शासित प्रदेश च शैहरी मुकामी निकाएं च होर दुए पच्छड़े दे वर्ग समुदाय लेई आरक्षण बारै कायम कीता गेआ ऐ। स्हाड़े संवाददाता नै जानकारी दिती ऐ जे साबका आईएएस अफसर राज कुमार भगत ते शेर-ए-कश्मीर यूनिवर्सिटी ऑफ एग्रीकल्चर ते टेक्नोलाजी दे साबका डीन प्रो. मोहिंद्र सिंह होर एहदे मिम्बर न।

<><><><><><>

## DC-Poonch

पुंछ दे जिला विकास कमिशनर यासिन मोहम्मद चौधरी होरें स्वच्छता पखवाड़ा अभियान गितै तैयारिं दा जायजा लैने लेई कल इक बैठक सद्दी। बैठका च जानकारी दिती गई जे पैहली अगस्त कोला लेइए 15 अगस्त तोड़ी एह पखवाड़ा मनाया जाग। डीसी होरें स्कूलें, कालजें ते दफतरें सने सब्बनें इदारें दे अध्यक्षें गी निर्देश दिता जे सब्बनें गी स्वच्छता संगंध चुकाई जा।

<><><><><><>

## Kathua-Dengue

कठुआ दे डिप्टी कमिशनर डा. राकेश मिन्हास होरें इक बैठक लाइए जिले च डेंगू दी रोकथाम बारै तौर-तरीके ते होर दुए प्रबंधन दा जायजा लैता।

कठुआ दे मुख्ख सेहत अधिकारी होरें जिले च डेंगू बारै व्यापक जानकारी दिती जेदे च पिछले बरे डेंगू दे मामले, नमूनें किट्ठे करने, मता डेंगू फैलने दी शेंका आले लाहकें ते होर दुए मामले शामिल हे। उनें अफसरें गी मरीजें दी सटीक जांच करने ते लोड़चदे नियम कायदे अपनाने लेई गलाया।

<><><><><><>

### J&K Operation

पुंछ जिले च सुरक्षाबलें संदिग्ध नकलोहरकत दिक्खे जाने मगरा तपाशी अभियान रम्भ कीता ऐ। स्हाड़े संवाददाता नै जानकारी दिती ऐ जे सुरक्षाबलें जिले दे पछेत्रे ग्राएं च लाहकें दी घेराबंदी करिए तपाशी अभियान चलाया। एह तपाशी अभियान 2 आतंकवादिएं दी नकलोहरकत दिक्खे जाने मगरा चलाया गेआ। सुरक्षाबलें Sanai, Jangal, पट्टन ते सुरनकोट दे आले-दोआले दे ग्राएं च ते किश्तवाड़ दे धब्रशाला लाहके दे बांगर सरूर जंगलें च तपाशी अभियान चलाया। सेना नै 4 थवां बद्द सैनिकें गी जिंदे च सिखलाई याफता कमांडो बी शामिल न गी तैनात कीता ऐ तां जे जम्मू खिते दे प्हाड़ली जिलें थवां आतंकवादिएं दा सफाया कीता जाई सकै। एह गें 40 थवां 50 विदेशी आतंकवादिएं दे समूह बारै थ्होई दी जानकारी दे मददेनजर पुट्टी गई ऐ। कठुआ, डोडा, रियासी, पुंछ ते राजौरी च आतंकवादिएं आस्सेआ घात लाइए हमले कीते गए।

<><><><><><>

### OGW-Poonch

सुरक्षाबलें कल पुंछ जिले दे सुरनकोट लाहके च हिज्बुल मुजाहिद्दीन आतंकवादी संगठन लेई कम्म करने आले मोहम्मद खलील लोन गी गिरफ्तार कीता ऐ।

ओह बांडीपोरा जिले दा रौहने आला ऐ। सुरक्षाबलें आस्सेयां पुंछ, राजौरी, किश्तवाड़ ते डोडा जिले च तपाशी अभियान चलाए गए तां जे आतंकवादिएं उंदे सहायकें ते आतंकवादी संगठन थ्वां बाहर रेइए कम्म करने आले ओ.जी.डब्ल्यू दा पता लाया जाई सकै। खलील थ्वां इक पस्तौल ते किश असलाह बरामद होआ ऐ। एह आतंकवादिएं गी घुसपैठ करोआने च मदद करदा हा।

<><><><><><>

### Amarnath-Yatra

29 जून गी औपचारिक तौरा पर शुरू होई दी श्री अमरनाथ जी दी यात्रा दे कल 32में रोज 56 जहार 10 श्रद्धालुएं पवित्र गुफा च मत्था टेकेया जेदे कन्नै गै यात्रा शुरू होने कोलां लेइए कल शामी तगर दर्शन करने आले श्रद्धालुएं दी गिनतरी 4 लक्ख 71 352 होई गई ऐ। तोआई अमरनाथ जी दी पवि छड़ी दे संरक्षक महंत दीपेंद्र गिरी होरें दस्सेया ऐ जे पवित्र छड़ी मबारक 14 अगस्त गी श्रीनगर स्थित दशनामी अखाड़े थमां पवित्र गुफा लेई रवाना कीता जाग जेदे शा पैहले उत्थे रिवायती रीति रिवाज ते पूजा अर्चना कीती जाग। अज्ज बड्डलै 1 जहार 654 श्रद्धालुएं दा इक होर जत्था जम्मू दे भगवती नगर आले आधार शिविर थमां घाटी लेई रवाना होआ। सख्त सुरक्षा बंदोबस्तें हेठ एह जत्था बालटाल ते पैहलगाम लेई रवाना होआ।

लौहकी बड्डिं कुल 51 गड्डिउं दे काफले च सवार इस जत्थे च शामिल 1654 श्रद्धालुं चा 456 बालटाल ते 1 जहार 198 यात्री पैहलगाम आले रस्तेयां पवित्र गुफा तोड़ी दा अपना सफर शुरू करंगन।

<><><><><><>

### DC-Udhampur-NCORD

उधमपुर जिले च नशाखोरी ते नशीले पदार्थे दे कारोबार पर रोक लाने लेई ते एहदे नै जुड़ी दिं बक्ख-बक्ख चुनौतिं दा मकाबला करने लेई जिला विकास कमिशनर सलोनी राय होरें कल NCORD दी जिला सतह दी कमेटी दी बैठक सददी। जिस दौरान उनें सरबंधत मैहकमे गी निर्देश दिता जे ओह नशाखोरी दे शकार ते प्रभावित लोकें दा पता लाने लेई अपने अभियान तेज करी देन। उनें लोकें च नशाखोरी दे माड़े असर बारे जागरूकता फैलाने, प्रभावित लोकें गी सलाह ते परामर्श उपलब्ध कराने ते जिले दे बक्ख-बक्ख हिस्सें च गतिविधिं च बाददा करने पर जोर दिता। उनें दोआइं दिं हट्टिं पर होने आली बिक्री दे कम्प्यूटराइज बिल जारी करना लाजमी बनाने दा बी निर्देश दिता।

<><><><><><>

### Vishivkarma

सरकारी पालिटेक्निक कालेज विक्रम चौक जम्मू च कल पीएम विश्वकर्मा स्कीम तैहत सर्टिफिकेट बंडने सरबंधी कार्यक्रम दा सरिस्ता कीता गेआ। इस दौरान 248 सखेत्रुं गी सर्टिफिकेट बंडे एग।

कालेज दे प्रिंसीपल होरें इस स्कीम दे मुख मकसद गी उजागर कीता। इस स्कीम तैहत कम्मगारें गी पंछान थहोग ते उनेंगी 5 थवां 7 दिनें दी बुनियादी खिलाई बी दिती जाग।

<><><><><><>